

Biblioteca San Nicolas ta habri normal bek entrante dialuna

ORANJESTAD- Ultimo 2 luna tabata tin problema cu e sistema di aircó na biblioteca sucursal San Nicolas. Debi na esaki mester a cera algun espacio. Mientrastanto a resolve e problema, a reemplaza aircó y tur

departamento di biblioteca ta habri normal bek desde dialuna entrante. Biblioteca sucursal San Nicolas ta habri di dialuna pa diabierna. Pa esunnan cu ta traha den dia biblioteca sucursal San Nicolas ta habri 2 anochi,

diamars y diahuebs. Entrante februari tur diaranson atardi tin actividad special pa mucha. Tin contamento di storia, wega y obra di man. E actividadnan ta complementamente gratis. Miembresia di biblioteca pa fia buki ta 5 florin pa adulto pa aña, 3 florin pa hoben y 1 florin pa mucha. Por fia buki te na un maximo di 3 siman. Lesamento ta importante tanto pa mucha como pa adulto pa diferente motibo, desaroyo di idioma, amplia vocabulario, incentiva imaginacion, pa conoce storia, pa sostene tur vak na scol, pa conoce otro cultura y custumber, pa haya informacion riba un variedad di tema, pa por studia miho y mucho mas. Investigacion a muestra cu lesamento ta yuda e mente



di hendenan adulto y grandi pa no lubida y pa keda mentalmente activo y trein e memoria. Lesamento ta tene e cerebro activo. Es decir, lesamento ta un actividad

saludabel pa un y tur. Asina ta cumpli cu un di e meta-nan di biblioteca di brinda e oportunidad pa haci un actividad saludabel na pueblo henter. □